

# Nagina limita tar la deducziun per ils viadis

Revisiun parziala da la lescha da taglia

■ (anr/fa) La revisiun parziala da la lescha da taglia chantunala è necessaria per adattar la lescha chantunala a la federala. Surtut l'imposiziun da taglias sin l'atgna locaziun e la deducziun per viadis han dà da discurre.

«Questa revisiun parziala da nossa lescha da taglia è daventada necessaria causa ch'il chantun sto adattar sia lescha al dretg federal», ha ditg *Urs Marti* (pld, Cuira), il president da la cumissiun predeliberanta da la revisiun parziala da la lescha da taglia chantunala grischuna glindesdi, a l'emprim di da la sessiun d'october. In'ulteriura finamira da la revisiun è tenor il commember da la cumissiun *Marcus Caduff* (pcd, Lumnezia) da stgaffir la premissa per modernisar l'administraziun da taglia. «Ils puncts principals da la revisiun vegnan ad esser l'imposiziun da taglias sin l'atgna locaziun e la deducziun per ils viadis tranter il lieu d'abitar e la plazza da lavur», ha ditg Marti. Ch'i sa tractia tar quest segund punct d'in project da votaziun federal, ha punctuà cussegliera guvernativa *Barbara Janom Steiner*, «la confederaziun permetta tar la taglia directa deducziuns da maximalmain 3000 francs. Sin nivel chantunal surlascha ella la decisiun da limitar la deducziun respectiva explicitamain als chantuns.» Fin uss pudevan ils pajataglia deducir illimitadamain custs per quests viadis.



**Fitg engaschads en la debatta davart la revisiun parziala da la lescha da taglia: deputà Urs Marti (pld Cuira) e deputà Marcus Caduff (pcd Lumnezia).**

## Resguardar las cundiziuns particularas en Grischun

Urs Marti ha menziunà las cundiziuns dal Grischun sco chantun muntagnard che sa differenzieschan dad auters chantuns: «Cunquai che la situaziun en las valladas cun pitschnas vischnancas sforza automaticamain blers da far detg lungs viadis per arrivar al lieu da lavur proponan regenza e maioritad da la cumissiun da fixar ina deducziun maximala da 9000

francs.» La maioritad dal parlament grischun era dad auter avis ed ha decis da betg limitar la deducziun per ils viadis. Era la proposta da la fracziun da la pld da reducir la valur da l'atgna locaziun d'enfin uss 70 pertschient sin 60 pertschient ha fatg naufragi. Cun 66:49 vuschs e naginas abstenziuns da la vusch ha la maioritad dal cussegl grond refusà, sco proponì da la regenza e da la cumissiun unanima, questa reducziun.